

» locutus sum, iterum non adjiciam<sup>1</sup>. » Nisi in mysterio accipiatur, quomodo semel locutus est Job, qui toties locutus est? Aut quomodo iterum non adjicet, post paululum locuturus? Sed locutio hic intelligenda est progressus animæ in hæc exteriora, quo relinquit Deum, et ei resistit. Unde major iste progressus, etiam clamor in Scriptura appellatur, cum dicit Deus clamorem Sodomorum ad se pervenisse<sup>2</sup>. Cui locutioni atque clamori contrarium est beatissimum illud silentium, de quo dicitur: « Et silebit sine timore ab omni malignitate. » Bene itaque dicit semel se locutum continua quadam locutione in tota vita veteris hominis, « Cum esset spiritus ambulans, et » non revertens<sup>3</sup>. » Nunc autem manum imponens ori, ne ultra progrediatur, promittit se non adjicere iterum, ne recedat a Deo. Amen.

<sup>1</sup> Job. xxxix, 35. — <sup>2</sup> Gen. xviii, 20. — <sup>3</sup> Psal. lxxvii, 39.

# S. AUR. AUGUSTINI HIPPONENSIS EPISCOPI

## ENARRATIONES

IN

## PSALMOS.

### ENARRATIO

#### IN PSALMUM I.

I. « BEATUS vir<sup>1</sup> qui non abiit in consilio impiorum<sup>2</sup>. » De Domino nostro Jesu Christo, hoc est, homine Dominico accipiedum<sup>3</sup> est<sup>4</sup>. « Beatus vir qui non abiit in consilio impiorum, » sicut homo terrenus, qui uxori consensit deceptæ a serpente, ut Dei præcepta præteriret<sup>4</sup>. « Et in via peccatorum non stetit. » Quia venit quidem in via peccatorum, nascendo sicut peccatores: sed non stetit, quia eum non tenuit illecebra sæcularis. » Et in cathedra pestilentiae non sedit. » Noluit regnum terrenum cum superbia: quæ ideo cathedra pestilentiae recte intelligitur, quia non fere quisquam est qui careat amore dominandi, et humanam non appetat gloriam; pestilentia est enim

<sup>1</sup> Vide D. Guillon, tom. xxi, p. 101 et seqq. — <sup>2</sup> Psal. 1, 1. — <sup>3</sup> Vide 1 Retract. xix. — <sup>4</sup> Genes. iii, 6.

morbus late pervagatus , et omnes aut pene omnes involvens. Quanquam accommodatius accipiat cathedralia pestilentiae, perniciosa doctrina, cuius sermo ut cancer serpit<sup>1</sup>. Deinde considerandus est ordo verborum , « Abiit , » stetit, sedit. » Abiit enim ille, cum recessit a Deo. Stetit, cum delectatus est peccato. Sedit, cum in sua superbia confirmatus, redire non potuit, nisi per eum liberatus, qui neque abiit in consilio impiorum , nec in via peccatorum stetit, nec in cathedralia pestilentiae sedit.

**II.** « Sed in lege Domini fuit voluntas ejus , et in lege ejus meditabitur die ac nocte<sup>2</sup>. Justo non est lex posita<sup>3</sup>, ut dicit Apostolus. Sed aliud est esse in lege, aliud sub lege. Qui est in lege, secundum legem agit : qui est sub lege , secundum legem agitur. Ille ergo liber est , iste servus. Deinde aliud est lex quae scribitur, et imponitur servienti : aliud lex quae mente conspicitur, ab eo qui non indiget litteris. « Meditabitur die ac nocte : » aut sine intermissione intelligendum est ; aut « die » in laetitia , « nocte » in tribulationibus; dicitur enim: « Abraham diem meum vidit, et gavisus est<sup>4</sup>. » Et de tribulatione dicitur : « Insuper et usque ad noctem emendaverunt me renes mei<sup>5</sup>. »

**III.** « Erit tanquam lignum quod plantatum est secundum decursus aquarum<sup>6</sup> : » id est, aut secundum ipsam Sapientiam, quae dignata est hominem suscipere ad salutem nostram : ut ipse homo sit lignum plantatum secundum decursus aquarum : potest enim et hoc intellectu accipi, quod in alio Psalmo dicitur : « Fluvius Dei repletus est aqua<sup>7</sup>. » Aut secundum Spiritum sanctum, secundum quem dicitur ; « Ipse vos baptizabit in Spiritu sancto<sup>8</sup> : » et illud : « Qui sitit, veniat, et bibat<sup>9</sup> : » et

<sup>1</sup> 2 Tim. n, 17. — <sup>2</sup> Psal. 1, 2. — <sup>3</sup> 1 Tim. 1, 9. — <sup>4</sup> Joan. viii, 56. — <sup>5</sup> Psal. xv, 7. — <sup>6</sup> Id. 1, 3. — <sup>7</sup> Id. lxiv, 10. — <sup>8</sup> Matth. iii, 10. — <sup>9</sup> Joan. viii, 37.

illud : « Si scires donum Dei, et quis est qui a te aquam petit ; petisses ab eo , et daret tibi aquam vivam , unde qui biberit, non sitiet in æternum<sup>1</sup>; sed efficietur in eo fons aquæ salientis in vitam æternam. » Aut « Secundum decursus aquarum , » secundum populorum peccata, quia et aquæ populi interpretantur in Apocalypsi<sup>2</sup>; et decursus non absurde intelligitur lapsus, quod pertinet ad delictum. Lignum ergo illud, id est, Dominus noster, de aquis decurrentibus, id est , populis peccatoribus, trahens eos in via in radices disciplinæ suæ, « Fructum dabit , » hoc est, constituet Ecclesias : « In tempore suo , » id est, postquam clarificatus est resurrectione et ascensione in cœlum. Tunc enim Spiritu sancto misso Apostolis, et eis in fiducia sui confirmatis et directis in populos, fructificavit Ecclesias. « Et folium ejus non decidet , » id est, verbum ejus non erit irritum; « Quia omnis caro foenum, et claritas hominis ut flos foeni : foenum aruit, et flos decidit, verbum autem Domini manet in æternum<sup>3</sup>. » Et omnia quæcumque fecerit prosperabuntur, » id est, quæcumque illud lignum attulerit : quæ omnia videlicet accipienda sunt fructus et folia, id est, facta et dicta.

**IV.** « Non sic impii, non sic : sed tanquam pulvis , quem projicit ventus a facie terræ<sup>4</sup>. » Terra hic accipienda est ipsa stabilitas in Deo, secundum quam dicitur : « Dominus pars hæreditatis meæ, etenim hæreditas mea præclara est mihi<sup>5</sup>. » Secundum hanc dicitur : « Suscine Dominum, et observa vias ejus , et exaltabit te , ut possideas terram<sup>6</sup>. » Secundum hanc dicitur : « Beati mites, quia ipsi hæreditate possidebunt terram<sup>7</sup>. » Similitudo autem hinc ducta est ; quia ut hæc terra visibilis exteriorem hominem nutrit, et continet : ita illa terra in-

<sup>1</sup> Id. iv, 10-14. — <sup>2</sup> Apoc. xvii, 15. — <sup>3</sup> Isaï xl, 6-8. — <sup>4</sup> Psal. i, 4. — <sup>5</sup> Id. xv, 5. — <sup>6</sup> Id. xxxvi, 34. — <sup>7</sup> Matth. v, 4.

visibilis interiorem hominem. A cuius terrae facie projicit ventus impium, id est, superbia, quia inflat<sup>1</sup>. Quam cavers ille qui ineberiabatur ab ubertate domus Dei, et torrente voluptatis ejus potabatur, dicit: « Non veniat mihi » pes superbiæ<sup>2</sup>. » Ab hac terra projectit superbia eum, qui dixit: « Ponam sedem meam ad Aquilonem, et ero » similis Altissimo<sup>3</sup>. » Ab hujus terrae facie projectit etiam eum, qui, cum consensisset et gustasset de prohibito ligno, ut esset sicut Deus, abscondit se a facie Dei<sup>4</sup>. Hanc terram ad interiorem hominem pertinere, et inde superbia hominem projici, maxime intelligi potest in eo quod scriptum est: « Quid superbit terra et cinis? quoniam in vita » sua projectit intima sua<sup>5</sup>; » unde enim projectus est, non absurde se dicitur projecisse.

V. « Ideo non resurgunt impii in judicio<sup>6</sup>: » ideo scilicet, quia tanquam pulvis projiciuntur a facie terræ. Et bene hoc eis dixit auferri quod superbi ambiant, id est, ut judicent, ut hoc ipsum planius dictum intelligatur sequenti sententia: « Neque peccatores in consilio justorum. » Solet enim hoc modo repeti planius quod superius dicitur, ut peccatores intelligantur impii; et quod supra dictum est, « In judicio, » hic dictum sit, « In consilio justorum. » Aut certe si aliud sunt impii, aliud peccatores, ut quanquam omnis impius peccator sit, non tamen omnis peccator sit impius: « Impii non resurgunt in judicio, » id est, resurgent quidem, sed non ut judicentur, quia jam poenis certissimis destinati sunt: « Peccatores autem » non resurgunt in consilio justorum, » id est, ut judicent, sed forte ut judicentur, ut de his dictum sit: « Uniuscujusque opus quale sit, ignis probabit: si cuius » opus manserit, mercedem accipiet: si cuius autem opus

<sup>1</sup> Cor. viii, 1. — <sup>2</sup> Psal. xxxv, 9 et 12. — <sup>3</sup> Isai. xiv, 13, 14. — <sup>4</sup> Gen. iii, 6-8. — <sup>5</sup> Eccli. x, 9, 10. — <sup>6</sup> Psal. i, 5.

» exustum fuerit, detrimentum patietur; ipse autem salvus erit, sic tamen quasi per ignem<sup>1</sup>. »

VI. « Quoniam novit Dominus viam justorum<sup>2</sup>. » Quemadmodum dicitur: « Novit salutem medicina, morbos autem non novit, » et tamen etiam morbi arte medicinae agnoscuntur: sic dici potest nosse Dominum viam justorum, viam vero impiorum non nosse: non quia aliquid Dominus nescit, et tamen dicit peccatoribus: « Non novi » vos<sup>3</sup>. Iter autem impiorum peribit, » pro eo positum est, ac si diceretur: « Iter autem impiorum non novit Dominus. » Sed planius dictum est, ut hoc sit nesciri a Domino, quod est perire, et hoc sit sciri a Domino, quod est manere: ut ad scientiam Dei esse pertineat, ad ignorantiam vero non esse. Quia Dominus dicit: « Ego sum qui » sum: » et, « Qui est, misit me<sup>4</sup>. »

## ENARRATIO

### IN PSALMUM II.

I. « Ut quid fremuerunt gentes, et populi meditati sunt inania? Astiterunt reges terræ, et principes con venerunt in unum adversus Dominum, et adversus Christum ejus<sup>5</sup>? » Pro eo dictum est, « Ut quid, » ac si diceretur, frustra. Non enim impleverunt quod voluerunt, ut Christus extingueretur; dicitur hoc enim de persecutoribus Domini, qui et in Actibus Apostolorum commemorantur<sup>6</sup>.

II. « Disrumpamus vincula eorum, et abjiciamus a nobis jugum ipsorum<sup>7</sup>. » Quanquam et possit aliter intelligi,

<sup>1</sup> Cor. iii, 13-15. — <sup>2</sup> Psal. i, 6. — <sup>3</sup> Math. vii, 23. — <sup>4</sup> Exod. iii, 14. — <sup>5</sup> Psal. ii, 1, 2. — <sup>6</sup> Act. iv, 26. — <sup>7</sup> Psal. n, 3.

tamen aptius ex eorum persona accipitur, quos dixit inania meditatos, ut hoc sit : « Disrumpamus vincula eorum et » abjiciamus a nobis jugum ipsorum<sup>1</sup>, » demus operam, ut non nos alliget, neque imponatur nobis christiana religio.

III. « Qui habitat in cœlis irridebit eos, et Dominus sub- » sannabit eos<sup>2</sup>. » Repetita sententia est : nam pro eo quod est, « Qui habitat in cœlis, » subsequenter positum est, « Dominus; » et pro eo quod est, « Irridebit, » subsequenter positum est, « Subsannabit. » Nihil horum tamen sapere oportet carnaliter, quasi aut buccis Deus irrideat, aut naso subsannet : sed ea vis accipienda est, quam dat sanctis suis, ut futura cernentes, id est, nomen Christi et dominacionem pervagaturam in posteros, et universas gentes obtenturam, illos inania meditatos esse intelligent. Hæc enim vis, qua ista præscita sunt, irrisio Dei est et subsannatio. « Qui habitat in cœlis, irridebit eos. » Cœlos si animas sanctas accipiamus ; per has eos, utique præsciens quid futurum sit, deridebit Deus et subsannabit.

IV. « Tunc loquetur ad eos in ira sua, et in furore suo » conturbabit eos<sup>3</sup>. » Planius enim ostendens quomodo ad eos loquetur, dixit : « Conturbabit eos : » ut « In ira » sua » hoc sit, « In furore suo. » Iram autem et furem Domini Dei non perturbationem mentis oportet intelligi, sed vim qua justissime vindicat, subjecta sibi ad ministerium universa creatura. Præcipue namque povidendum est et tenendum illud, quod scriptum est in Salomone : « Tu autem, Domine virtutis, cum tranquillitate judicas, et » cum magna reverentia disponis nos<sup>4</sup>. » Ira ergo Dei est motus qui fit in anima, quæ legem Dei novit, cum eamdem legem videt a peccatore præteriri ; per hunc enim motum justarum animarum multa vindicantur. Quanquam possit

<sup>1</sup> Psal. ii, 3. — <sup>2</sup> Ibid. 4. — <sup>3</sup> Ibid. 5. — <sup>4</sup> Sap. xi, 18.

ira Dei recte intelligi etiam ipsa mentis obscuratio, quæ consequitur eos qui legem Dei transgrediuntur.

V. « Ego autem constitutus sum rex ab eo super Sion » montem sanctum ejus, prædicans præceptum ipsius<sup>1</sup>. » Ex persona ipsius Domini nostri Jesu Christi ista manifesta sunt. Sion autem, si speculationem, ut quidam interpretantur, significat, nihil magis quam Ecclesiam debemus accipere, ubi quotidie intentio erigitur speculandæ claritatis Dei, sicut Apostolus dicit : « Nos autem revelata facie » gloriam Domini speculantes<sup>2</sup>. » Ergo iste sensus est, « Ego autem constitutus sum rex ab eo super Ecclesiam sanctam ejus : » quam montem appellat propter eminentiam et firmatatem. « Ego autem constitutus sum rex ab eo. » Ego scilicet, cuius vincula illi disrumpere, et jugum meditantur abjecere. « Prædicans præceptum ipsius. » Quis hoc non sentiat, cum quotidie factitur?

VI. « Dominus dixit ad me : Filius meus es tu, ego » hodie genui te<sup>3</sup>. » Quanquam etiam possit ille dies in prophetia dictus videri, quo Jesus Christus secundum hominem natus est : tamen « Hodie » quia præsentiam significat, atque in æternitate nec præteritum quidquam est, quasi esse desierit ; nec futurum, quasi nondum sit ; sed præsens tantum ; quia quidquid æternum est, semper est : divinitus accipitur secundum id dictum : « Ego hodie » genui te, » quo sempiternam generationem virtutis et sapientiæ Dei, qui est unigenitus Filius, fides sincerissima et catholica prædicat.

VII. « Postula a me, et dabo tibi gentes hæreditatem » tuam<sup>4</sup>. » Hoc jam temporaliter secundum susceptum hominem, qui sacrificium sese obtulit pro omnibus sacrificiis, « Qui etiam interpellat pro nobis<sup>5</sup> : » ut ad totam ipsam

<sup>1</sup> Psal. ii, 6. — <sup>2</sup> Cor. viii, 18. — <sup>3</sup> Psal. ii, 7. — <sup>4</sup> Ibid. 8. — <sup>5</sup> Rom. viii, 34.

dispensationem temporalem, quæ pro genere humano facta est, referatur quod dictum est: « Postula a me: » ut scilicet gentes nomini christiano copulentur, atque ita a morte redimantur, et possideantur a Deo. « Dabo tibi gentes hæreditatem tuam: » quas possideas ad earum salutem, et quæ tibi fructifcent spiritalia. « Et possessio-» nem tuam terminos terræ. Idem repetitum est. « Ter-» minos terræ, » pro eo positum, quod dictum est, « Gentes: » sed hoc planius, ut omnes gentes intelligamus. « Possessionem autem tuam, » pro eo quod dictum est, « Hæreditatem tuam. »

VIII. « Reges eos in virga ferrea: » in inflexibili justitia. « Et tanquam vas figuli conteres eos<sup>1</sup>: id est, conteres in eis terrenas cupiditates, et veteris hominis lutulenta negotia, et quidquid de peccatore limo contractum atque inolutum est. « Et nunc reges intelligite<sup>2</sup>. Et nunc, » id est, jam innovati, jam contritis luteis tegumentis, id est, carnalibus vasis erroris, quæ ad præteritam vitam pertainent: « Nunc intelligite jam reges, » id est, jam valentes regere quidquid in vobis servile atque bestiale est; et jam valentes pugnare, non quasi aërem cædentes, sed castigantes vestra corpora, et servituti subjicientes<sup>3</sup>. « Eru-» dimini omnes qui judicatis terram. » Hoc idem repetitum est. « Erudimini, » pro eo quod dictum est, « Intelligite. » Qui judicatis autem terram, » pro eo quod<sup>4</sup> dictum est, « Reges. » Spiritales enim significat qui judicant terram. Inferius enim nobis est, quidquid judicamus: quidquid autem infra spiritalem hominem est, merito terra nominatur, quia terrena labe sauciatum est.

IX. « Servite Domino in timore<sup>4</sup>: » ne in superbiam vertat quod dictum est: « Reges qui judicatis terram. Et » exultate ei cum tremore<sup>5</sup>. » Optime subjectum est

<sup>1</sup> Psal. ii, 9. — <sup>2</sup> Ibid. 10. — <sup>3</sup> Cor. ix, 26, 27. — <sup>4</sup> Psal. ii, 11. — <sup>5</sup> Ibid.

« Exultate, » ne ad miseriam valere videretur quod dictum est: « Servite Domino in timore. » Sed rursus ne id ipsum pergeret in effusionem temeritatis, additum est, « Cum » tremore: » ut ad cautionem valeret circumspectamque sanctificationis custodiam. Etiam sic potest accipi: « Et » nunc reges intelligite. » Id est, Et jam nunc me rege constituto, nolite tristes esse reges terræ, quasi bonum vestrum vobis ablatum sit: sed intelligite potius, et erudimini. Id enim vobis expedit ut sub illo sitis, a quo intellectus et eruditio vobis datur. Et hoc vobis expedit, ut non temere dominemini, sed Domino omnium cum timore serviatis, et exultetis in beatitudine certissima et sincerissima, cauti et circumspicientes ne ab ea per superbiam decidatis.

X. « Apprehendite disciplinam, nequando irascatur Dominus, et pereatis de via justa<sup>1</sup>. » Hoc est quod ait: « Intelligite et erudimini. » Nam intelligere et erudiri, hoc est, apprehendere disciplinam. Verumtamen in eo quod dicitur, « Apprehendite, » satis significatur præsidium quoddam atque munimentum esse adversus omnia quæ obesse possent, nisi tanta cura apprehenderetur. « Ne-» quando autem irascatur Dominus, » cum dubitatione positum est; non secundum visionem Prophetæ, cui certum est: sed secundum eos ipsos qui monentur; quia cum dubitatione solent cogitare iram Dei, quibus non aperte revelatur. Hoc ergo sibi ipsi debent dicere, « Ap-prehendamus disciplinam, nequando irascatur Dominus, et pereamus de vita justa. » Jam vero, « Irascatur Domi-» nus, » quomodo accipiendum sit, supra dictum est<sup>2</sup>. « Et pereatis de via justa. » Hæc magna poena est, quæ ab iis formidatur, qui aliquid dulcedinis justitiae percep-

<sup>1</sup> Psal. ii, 12. — <sup>2</sup> Supra n. 4.

runt. Qui enim perit de via justitiae, cum magna miseria per vias iniquitatis errabit.

XI. « Cum exarserit in brevi ira ejus, beati omnes qui confidunt in eo<sup>1</sup>; » id est, cum vindicta venerit, quæ impiis et peccatoribus præparatur, non solum eos non attinget qui confidunt in Domino, sed etiam ad regnum illis instruendum et sublimandum proficiet. Non enim dixit: « Cum exarserit in brevi ira ejus, securi omnes qui confidunt in eo, » tanquam hoc solum inde habeant, quod non puniantur: sed « Beati » dixit, ubi est honorum omnium summa et cumulus. Quod autem positum est, « In brevi, » hoc significare arbitror, quia repentinum aliquid erit, dum hoc remotum et longe futurum peccares existimabunt.

### ENARRATIO IN PSALMUM III.

Psalmus David, cum fugeret a facie Abessalon filii sui<sup>2</sup>.

I. HUNC Psalmum ex persona Christi accipiendum persuadet quod dictum est: « Ego dormivi, et somnum cœpi: » et exurrexi, quoniam Dominus suscipiet me<sup>3</sup>. » Magis enim hoc ad passionem et resurrectionem Domini congruenter sonat, quam ad illam historiam in qua David scribitur fugisse a facie bellantis adversum se filii sui<sup>4</sup>. Et quoniam scriptum est de Discipulis Christi: « Quandiu cum eis est sponsus, non jejunant filii sponsi<sup>5</sup>: » non mirum si filius ejus impius, significatur discipulus impius,

<sup>1</sup> Psal. II, 13. — <sup>2</sup> Id. III, 1. — <sup>3</sup> Ibid. 6. — <sup>4</sup> 2 Reg. xv, 17. — <sup>5</sup> Matth. ix, 15.

qui eum tradidit. A cujus facie fugisse quanquam historice possit accipi; quando illo discedente, secessit cum cæteris in montem: tamen spiritualiter, quando mentem Iudæ Filius Dei, id est, Virtus et Sapientia Dei deseruit, cum eum diabolus penitus invasit, in eo quod scriptum est: « Et intravit diabolus in cor ejus<sup>1</sup>; » bene accipitur a facie ejus Christum fugisse: non quia Christus diabolo cessit, sed Christo discedente, diabolus possedit. Quem discessum fugam esse in hoc Psalmo appellatum celeritatis causa arbitror: quod verbo etiam Domini significatur dicentis: « Quod facis, cito fac<sup>2</sup>. » Loquimur etiam sic in consuetudine, ut dicamus: Fugit me, quod in mentem non venit: et de homine doctissimo dicimus: Nihil eum fugit. Propterea veritas fugit mentem Iudæ, cum eum illustrare destitut. Abessalon autem, sicut quidam interpretantur, in latina lingua dicitur Patris pax. Quod mirum videri potest, sive in historia Regnorum, cum bellum adversus patrem Abessalon gesserit; sive in historia Novi Testamenti, cum traditor Domini Judas fuerit, quemadmodum Patris pax possit intelligi. Sed et ibi qui diligenter legunt, vident in illo bello David pacatum fuisse filio, qui etiam magno cum dolore planxit extinctum, dicens: « Abessalon filius meus, quis dabit mihi mori pro te<sup>3</sup> : » et in historia Novi Testamenti ipsa Domini nostri tanta et tam miranda patientia, quod eum tandem pertulit tanquam bonum, cum ejus cogitationes non ignoraret, cum adhibuit ad convivium, in quo corporis et sanguinis sui figuram Discipulis commendavit et tradidit<sup>4</sup>; quod denique in ipsa traditione osculum accepit<sup>5</sup>, bene intelligitur pacem Christum exhibuisse traditori suo; quamvis ille tam sceleratæ cogitationis interno bello vastaretur. Et ideo

<sup>1</sup> Joan. XIII, 2. — <sup>2</sup> Ibid. 27. — <sup>3</sup> 2 Reg. XVII, 33. — <sup>4</sup> Joan. XIII. — <sup>5</sup> Matth. XXVI, 49.